

au mont Quirinalis dict a present mote Cauallo, sous le palais du Pape, qui fut aultresfois dn Card. de Ferrare, il verra certaines grottes antiques, ou logeoient toutes les femmes impudiques, auprès desquelles en vne grande place les Romains celebrent les ieux qu'ilz appelloient Floralia, avec toute deshonesteté, & lasciueté.

*Des cheuaux de Marbre, qui sont a monte Cauallo, & des Baings, ou Thermes de Diocletian.*

**L**uy fault prendre après vne petite ruette, qui va sur le mont Cauallo, ou estant arriué, il verra deux cheuaux de marbre qui d'Egypte furent enuoyez a Neron, le palais duquel il verra tout auprès, mais bien mieux de l'autre costé, ou est l'Eglise, que faulsemment on dict auoir esté le temple du Soleil, d'autant qu'auourd'huy l'on voit vn chemin secret qui venoit de son palais, sur de tresbelles colonnes iusques a l'endroict dict Oratorium Neronis, les masures duquel se voyent encore en pied, & ce fort peu loing des deux cheuaux. Après cela il prendra le droict chemin, qui va vers les Thermes, ou baings de Diocletian, a main gauche duquel es vignes mesmes, dudict Card. de Ferrare, commenceoient les estuues de l'Empereur Constantin, & s'estendoient iusques a s. Susanne, de l'autre costé desquelles estoit le Senat des Matrones, pauvres veufues, & Orfelines, ou premierement que d'entrer les Romains visitoient l'autel d'Apollon qui en estoit vis a vis.

En fin il arriuera aux Thermes de Diocletian, d'ou ie ne voudrois pas qu'il se partist sans premieremét les auoir bien veues, & s'estonnera comme il est possible de faire vn aultre tel edifice, a quoy ie responds que ny Empereur, ny Roy de France, ny tous les Princes Chrestiens en pourroyent faire vn semblable. Il ma esté acertené par vn Reuerend pere, qu'il y a des cauernes, & lieux secretz sous terre, dont l'vne passe au Capitole, l'autre a s. Sebastian, & la troisieme passant sous le Tybre, arriue iusques au mont Vatican: Ie ny ay pas toutesfois esté, & auroy desir d'y aller, ledict Pere me monstra bien dans la vigne derriere les arcades certaines grottes, ou vn soir avec d'autres ie voulus entrer, & y cheminasmes a nostre aduis enuiron demy mille mais non pas vn droict chemin. Or avec vostre permission ie retourneray vn peu en arriere, pour ne passer sous fileuce choses si remarquables.